

НЕДЕЛЯ ВАИЙ. ВХОД ГОСПОДЕНЬ В ИЕРУСАЛИМ В СУББОТУ ВАИЙ ВЕЧЕРА

На Малей вечерни поставим стихи 4, и поем настояция стихиры.

Глас 6:

Подобен: Трдневно:

От незлобивых младенец Христе, * на жребяти седа приял еси победную песнь, * грядый ко страсти: * трисвятым пением от ангел воспеваемый.

Се Царь твой Сионе, * кроток и спасаей грядет на жребяти, * враги взыскуей поразити в крепости: * радуйся и красуйся с ваием празднующи.

Восплещим согласно вернии, * ветви добродетелей и мы, * яко отроцы ныне приносяще Христу, * и сему Божественных дел * распротрем одеяния, * и таинственно Сего приимем.

Ваиа добродетелей братие, * принесем Христу Богу грядущему, * нас ради человечески пострадати волею, * Божества крепостию всем безстрастие даровати.

Слава, и ныне, подобен тойже:

На плещях херувимских яко Бог носимый, * седает на жребя, * нас ради на снеть грядый хотением: * приидите усердно Сего с ваием воспоим.

На стиховне, глас 2:

Подобен: ДOME Евфрафов:

Светлися Сионе * новый ваием, * воспевай со отроки, * се Царь твой спасаей * к страсти грядет.

Стих: Из уст младенец и ссущих совершил еси хвалу.

Веселитесь Адаме и Ево, * с пророки, * се призвати * вас страстию, * Господь приходит.

Стих: Господи Господь наш, яко чудно имя Твое по всей земли.

Горе со Отцем, * и Духом, * ангельскую Приемый песнь, * обнищавает странно доле, * и отроческую песнь приемлет.

Слава, и ныне, подобен тойже:

Пою Твое страшное смотрение страхом, * еже осанна взываю Тебе: * мене бо грядеши спасти, * благословенный Господи.

Ныне отпускаеши: Трисвятое. И прочее якоже обычай.

И тропари, глас 1:

Общее воскресение, * прежде Твоея страсти уверяя, * из мертвых воздвиг еси Лазаря Христе Боже. * Темже и мы яко отроцы победы знамения носяще, * Тебе победителю смерти вошем: * осанна в вышних, благословен Грядый во имя Господне.

И другой, глас 4:

Спогребшеся Тебе крещением Христе Боже наш, * безсмертныя жизни сподобихомся воскресением Твоим, * и воспевающе зовем: осанна в вышних, * благословен Грядый * во имя Господне.

И бывает отпуст. И входим в трапезу.

В СУББОТУ ВАИЙ ВЕЧЕРА

На Велицей вечерни, по предначинательном псалме, обычное стихословие.
Блажен муж: кафисма вся. На Господи возвах, поставим стихов 10. И поем
стихиры самогласны 5, повторяюще я.

Глас 6:

Днесь благодать Святаго Духа нас собра, * и вси вземше крест Твой глаголем,
* благословен Грядый во имя Господне, * осанна в вышних. [Дважды.]

Имеяй престол небо, и подножие землю, * Бога Отца Слово и Сын
соприсносущный, * на жребяти безсловеснем смирися днесь, * в Вифанию
пришед. * Темже дети еврейския, * ветви руками держаще, хваляху гласом: *
осанна в вышних, * благословен грядый * Царь Израилев. [Дважды.]

Приидите и мы днесь весь новый Израиль, * яже от язык Церковь, * со
пророком Захариною возопиим: * радуйся зело дщи Сионова, * проповедуй дщи
Иерусалимова: * яко се Царь твой грядет тебе кроток и спасаяй, * и всedyй на
жребя осле, * сына подъяремника: * празднуй яже детей, * ветви руками держащи
похвали: * осанна в вышних, * благословен грядый Царь Израилев. [Дважды.]

Честное воскресение Твое прообразуя нам, * воздвигл еси умершаго
повелением Твоим, * бездыханнаго Лазаря друга Блаже, * из гроба четверодневна
смердяща. * Темже и на жребя возшед образно, * якоже на колеснице носимь, *
языки укротевая Спасе. * Сего ради и хваление приносит возлюбленный Израиль
* из уст ссущих, и младенец незлобивых, * зрящих Тя Христе, * входяща во
святыи град, * прежде шести дней Пасхи. [Дважды.]

Прежде шести дней Пасхи прииде Иисус во Вифанию, * и приступиша к
нему ученицы Его, глаголюще Ему: * Господи, где хощещи, уготоваем Ти ясти
Пасху. * Он же посла их: * идите в преднюю весь, и обрящете человека, * скудель
воды носяща: * последуйте ему, и дому владыще рцйте: * Учитель глаголет, * у
тебе сотворю Пасху со ученики Моими. [Дважды.]

Слава, 1-ю стихиру: Днесь благодать Святаго Духа:

Днесь благодать Святаго Духа нас собра, * и вси вземше крест Твой глаголем,
* благословен Грядый во имя Господне, * осанна в вышних.

И ныне, паки тойже.

Днесь благодать Святаго Духа нас собра, * и вси вземше крест Твой глаголем,
* благословен Грядый во имя Господне, * осанна в вышних.

Вход. Свете тихий.

Прокимен: Господь воцарися, в лепоту облечеса.

Бытия чтение. [Глава 49, ст. 1 – 12.]

Призва Иаков сыны своя, и рече им: соберитесь, да возвещу вам, что срящет
вас в последния дни. Соберитесь, и послушайте мене сынове Иаковли:
послушайте Израиля, послушайте отца вашего. Иудо, тебе похвалят братия твоя:
руце твои на плещу враг твоих: поклонятся тебе сынове отца твоего. Скимен львов
Иуда, от леторасли сыне мой возшел еси: возлег уснул еси яко лев, и яко скимен,

кто возбудит его? Не оскудеет князь от Иуды, и вождь от чресл его, дондеже придут отложеная ему: и той чаяние языков. Привязуяй к лозе жребя свое, и к винничю жребца ослате своего: исперет вином одежду свою, и кровино гроздия одеяние свое. Радостотворны очи его паче вина, и белы зубы его паче млека.

Пророчества Софониева чтение. [Глава 3, ст. 14 – 19.]

Тако глаголет Господь: радуйся дщи Сионова зело, проповедуй дщи Иерусалимова, веселися и преукрашайся от всего сердца твоего, дщи Иерусалимля. Отъят Господь неправды твоя, и избавил тя есть из руки враг твоих: воцарится Господь посреде тебе, и не узриши зла ктому. Во время оно речет Господь Иерусалиму: дерзай Сионе, да не ослабеют руже твои. Господь Бог твой в тебе, Сильный спасет тя: наведет на тя веселие, и обновит тя в любви Своей, и возвеселится о тебе во украшении, яко в день праздника. И соберу сотренья твоя: горе, кто приимет нань поношение? Се Аз сотворю в тебе, тебе ради, глаголет Господь, во время оно: и спасу утисненную, и отриновенную прииму, и положу я в похваление, и имениты по всей земли.

Пророчества Захариина чтение. [Глава 9, ст. 9 – 15.]

Тако глаголет Господь: радуйся зело дщи Сионя, проповедуй дщи Иерусалимля: се Царь твой грядет тебе праведен и спасаей, Той кроток, и всед на подъяремника и жребца юна. И потребит колесницы от Ефрема, и кони от Иерусалима, и потребит лук бранный, и множество, и мир от языков: и обладает водами от моря до моря, и от рек до исходящ земли. И ты в крови завета твоего, испустил еси узники твоя от рова не имуща воды. Сядите в тверделех связани сонмища, и за един день пришельствия твоего сугубо воздам ти. Занеже напрягох тя Себе Иудо яко лук, исполних Ефрема, и воздвигну чада твоя Сионе на чада еллинска, и осяжу тя яко меч ратника. И Господь на них явится, и изыдет яко молния стрела его: и Господь Бог Вседержитель в трубу вострубит, и пойдет в шуме прещения Своего. Господь Вседержитель защитит их.

На литии стихиры самогласны, глас 1:

Всесвятый Дух, * апостолы научивый глаголати * иными странными языки, * Той детем еврейским неискусозлобным повелевает звати: * осанна в вышних, благословен грядый Царь Израилев.

Собезначальный и соприисносущный, * Сын и Слово Отчее, * на жребяти безсловесном седя, * прииде днесь во град Иерусалим: * Егоже херувими со страхом зрети не могут, * дети восхвалиша, с ваием и ветвьми, * хвалу таинственно воспевающе: * осанна в вышних, осанна Сыну Давидову, * пришедшему спасти от прелести весь род наш.

Прежде шести дней Пасхи, * глас Твой услышася Господи, * во глубинах адовых: * темже и Лазаря четверодневна воздвигл еси. * Дети же еврейския взываху: * осанна Боже наш, слава Тебе.

Глас 2: **В**ходящу Ти Господи во святыи град, * на жребяти седя, * потщася еси приити на страсть, * да совершиши закон и пророки. * Дети же еврейския воскресения победу предвозвещающе, * сретяху Тя с ветвьми и ваием, глаголюще: * благословен еси Спасе, помилуй нас.

Слава Тебе Христе, * в вышних сидящему на престоле, * и ныне чаемому с честным Твоим Крестом. * Темже веселится дщи Сионова, * радуются языцы земнии, ветви держат дети, * ризы же ученицы, * и вся вселенная научися вопити Тебе: * благословен еси Спасе, помилуй нас.

Слава и ныне, глас 3:

Прежде шести дней бытия Пасхи, * прииде Иисус во Вифанию, * воззвати умерша четверодневна Лазаря, * и проповедати воскресение. * Сretoша же его и жены, * Марфа и Мариа сестры Лазаревы, вопиюще к Нему: * Господи, аще бы еси был зде, не бы умерл брат наш. * Тогда глагола к ним: * не предрекох ли вам: веруй в Мя, * аще и умрет, жив будет: * покажите ми, где положисте его? * И вопияше к нему Зиждитель всех: * Лазаре, гряди вон.

И обычные литии молитвы в паперти.

На стиховне стихирь самогласны, глас 8:

Радуйся и веселися граде Сионе, * красуйся и радуйся Церкви Божия: * се бо Царь твой прииде в правде, * на жребяти седа, * от детей воспеваемый: * осанна в вышних, благословен еси, * Имеяй множество щедрот, помилуй нас.

Стих: Из уст младенец и ссущих совершил еси хвалу.

Прииде Спас днесь во град Иерусалим, * исполни Писание, * и вси прияша в руки ваиа: * ризы же подстилаху Ему, вдуше, * яко Той есть Бог наш, * Емуже херувими вопиют непрестанно: * осанна в вышних, * благословен еси, * Имеяй множество щедрот помилуй нас.

Стих: Господи Господь наш, яко чудно имя Твое по всей земли.

На херувимех носимый, * и певаемый от серафим, * возсел еси на жребя Давидски Блаже: * и дети Тя воспеваху Боголепно, * иудее же хуляху беззаконно: * стропотное языков, седалище жребца прообразоваше, * из неверия в веру претворяемое. * Слава Тебе Христе, * едине Милостиве и Человеколюбче.

Слава, глас 6: Днесь благодать Святаго Духа нас собра:

И ныне, паки тойже.

Ныне отпуцаеши:

Трисвятое, и прочее по обычаю.

И глаголем тропарь отпустительный, глас 1:

Общее воскресение, * прежде Твоея страсти уверяя, * из мертвых воздвигл еси Лазаря Христе Боже. * Темже и мы яко отроцы победы знамения носяще, * Тебе победителю смерти вопием: * осанна в вышних, благословен Грядый во имя Господне. [Дважды.]

И другой, глас 4:

Спогребшися Тебе крещением Христе Боже наш, * безсмертныя жизни сподобихомся воскресением Твоим, * и воспевающе зовем: осанна в вышних, * благословен Грядый * во имя Господне.

Буди имя Господне: 3. И псалом: Благословяю Господа: И предложится чтение. Слово торжественное праздника.

В НЕДЕЛЮ ЦВЕТОНОСИЯ.

На Утрени, на Бог Господь, тропаря оба: Общее воскресение:

Глас 1:

Общее воскресение, * прежде Твоя страсти уверяя, * из мертвых воздвигл еси Лазаря Христе Боже. * Темже и мы яко отроцы победы знамения носяще, * Тебе победителю смерти вопием: * осанна в вышних, благословен Грядый во имя Господне. [Дважды.]

Слава, и ныне: Глас 4:

Спогребшися Тебе крещением Христе Боже наш, * безсмертныя жизни сподобихомся воскресением Твоим, * и воспевающе зовем: осанна в вышних, * благословен Грядый * во имя Господне.

По 1-м стихословии седален, глас 4.

Подобен: Удивися Иосиф:

С ветвьми умно очищени душами, * якоже дети Христа восхвалим верно, * велегласно зовуще Владыце: * благословен еси Спасе в мир пришедый, * спасти Адама от древния клятвы, * духовно быв Человеколюбче Новый Адам, * якоже благоволил еси: * вся Слове к полезному устройвый, слава Тебе.

Слава, и ныне, иный седален, глас 4.

Подобен: Явился еси:

Четверодневна Лазаря от гроба * возставивый Господи, * вся научил еси вопити с ваием и ветвьми Тебе: * благословен еси Грядый.

И чтение во Евангелии толковом Иоанна Златоустаго.

По 2-м стихословии седален, глас 4.

Подобен: Удивися:

Над другом Твоим Христе слезы точиши тайно, * и воздвизаеши из мертвых Лазаря лежаща мертва, * в немже сострадание показал еси человеколюбно: * уведевше же Твое пришествие Иисусе, * множество младенцев изыдоша днесь, в руках ваиа держаще, * осанна Тебе зывающе: * благословен еси, во еже мир спасти Пришедый.

Слава, и ныне, иный седален, глас 1.

Подобен: Камени запечатану:

Восхвалите согласно людие и языцы: * Царь бо ангельский взыде ныне на жребя, * и грядет хотяй на Кресте поразити враги, яко силен. * Сего ради и дети с ваием зывают песнь: * слава Тебе пришедшему Победителю: * слава Тебе Спасу Христу: * слава Тебе благословенному, единому Богу нашему.

И чтение тогоже слова.

Таже полиелей.

И по полиелеи седален, глас 8.

Подобен: Повеленное:

На престоле херувимсте, * и на жребяти возсед нас ради, * и к страсти вольней достиг, днесь слышит детей возглашающих, * осанна, народов вопиющих: * Сыне Давидов, ускори спасти, ихже создал еси, * благословенне Иисусе: * на сие бо пришел еси, * да разумеем славу Твою.

Слава, и ныне, паки тойже.

И чтение творим о празднице, Слово кир Андреа Критскаго.

Таже, степенна, первый антифон 4-го гласа.

Прокимен, глас 4:

Прокимен: Из уст младенец * и ссущих совершил еси хвалу.

Стих: Господи Господь наш, яко чудно имя Твое по всей земли. Всякое дыхание:

Евангелие от Матфея, зачало 83. [Мф. 21, 1 – 11, 15 – 17]

Во время оно, егда приближися Иисус во Иерусалим и приидоша в Вифсагию к горе Елеонстей, тогда Иисус посла два ученика, глаголя има: идита в весь, яже прямо вама, и абие обрящета осля привязано, и жребя с ним, отрешивша приведита Ми. И аще вама кто речет что, речета, яко Господь ею требует, абие же послет я. Сие же все бысть, да сбудетя реченное пророком, глаголющим: рцйте дщери Сионове, се Царь твой грядет тебе кроток, и всед на осля и жребя, сына подяремнича. Шедша же ученика и сотворша, якоже повеле има Иисус, приведоста осля и жребя, и возложиша верху ею ризы своя, и вседе верху их. Множайшии же народи постилаху ризы своя по пути, друзии же резаху ветви от древ и постилаху по пути. Народи же предходящии ему и вследствующии зваху, глаголюще: осанна Сыну Давидову, благословен Грядый во имя Господне, осанна в вышних. И вшедшу Ему во Иерусалим, потрясея весь град, глаголя: кто есть Сей? Народи же глаголаху: Сей есть Иисус Пророк, иже от Назарета Галилейска. Видевше же архиерее и книжници чудеса, яже сотвори, и отроки зовущя в церкви и глаголющя: осанна Сыну Давидову, негодоваша. И реща Ему: слышиши ли, что сии глаголют? Иисус же рече им: ей, несте ли чли николиже, яко из уст младенец и ссущих совершил еси хвалу? И оставль их, изыде вон из града в Вифанию и водворися ту.

Воскресение Христово: не глаголем.

Но абие псалом 50.

Таже иерей взем кадило, кадит крестообразно, глаголя молитву на благословение ваиа.

Диакон: Господу помолимся.

Мы же: Господи помилуй.

Господи Боже наш, седяй на херувимех, возставивый силу Твоего Сына, Господа нашего Иисуса Христа, да спасет мир Крестом, и погребением, и воскресением Своим: Егоже и ныне пришедша во Иерусалим на вольную страсть, людие седящии во тьме, и сени смертней, приемше воскресения знамения, ветви древес, и ваиа финик, воскресение знаменующе сретоша. Сам Владыко и нас по подражанию оных, в предпразднственный сей день, ваиа и ветви древес в руках

носящих соблюди и сохрани. Да якоже онии народи и дети осанна Тебе приношаху, и мы такожде в песнях и пениих духовных, животворящаго и тридневнаго Воскресения достигнем, в томже Христе Иисусе Господе нашем: с Нимже благословен еси, с Пресвятым, и Благим, и Животворящим Твоим Духом, ныне и присно, и во веки веков, аминь.

Егда же целуют братия Евангелие, раздавает игумен ваиа.

Слава, глас 2:

Днесь Христос входит во град Вифанию, * на жребяти седяй, * безсловесие разрешая язык злейшее, * древле свирепеющее.

И ныне, паки тойже.

Таже, Помилуй мя Боже:

Стихира, глас 6:

Днесь благодать Святаго Духа нас собра, * и вси вземше крест Твой глаголем, * благословен Грядый во имя Господне, * осанна в вышних.

Посем молитва: Спаси Боже люди: Господи помилуй, 12.

И по возгласе, канон: ирмосы по дважды, тропари на 12. Катавасиа, ирмос, оба лика: Творение господина Космы, егоже краегранесие: Осанна Христос евологименос Феос. Глас 4.

Песнь 1.

Ирмос: Явишася источницы бездны влаги непричастны, * и окрышася моря волнующаяся основания бурю: * манием бо запретил еси ему, * изрядныя же люди спасл еси. * Поюция победную песнь Тебе Господи.

Из уст младенец незлобивых, и ссущих, хвалу Твоих раб совершил еси, разрушити супостата, и отмстити страстию Креста, падение древняго Адама, древом же воскресити сего, поюща победную песнь Тебе Господи.

Хваление Церковь преподобных, живущему в Сионе, Тебе Христе приносит: о Тебе же Израиль творце своем радуется, и горы языцы противоположнии каменосердечнии, от лица Твоего возвеселишася, поюще победную песнь Тебе Господи.

Катавасиа: Явишася источницы бездны влаги непричастны, * и окрышася моря волнующаяся основания бурю: * манием бо запретил еси ему, * изрядныя же люди спасл еси. * Поюция победную песнь Тебе Господи.

Песнь 3.

Ирмос: Точащий краесекомый повелением Твоим, * твердый ссапа камень Израильтестии людие. * Камень же Ты еси Христе и жизнь, * на немже утвердися Церковь зовущая: * осанна благословен еси Грядый.

Мертвеца четверодневна повелением Твоим, из мертвых с трепетом ад испусти Лазаря. Воскресение бо Ты Христе и жизнь, в немже утвердися Церковь зовущи: осанна благословен еси Грядый.

Воспойте людие боголепно в Сионе, и молитву воздадите Христу во Иерусалиме, Сам грядет во славе со областию: в Немже утвердися Церковь зовущи: осанна благословен еси Грядый.

Катавасиа: Точащий краесекомый повелением Твоим, * твердый ссапа камень Израильтестии людие. * Камень же Ты еси Христе и жизнь, * на немже утвердися Церковь зовущая: * осанна благословен еси Грядый.

Ипакои, глас 6:

С ветвьми воспевше прежде, * с дресвы последи яша Христа Бога, * неблагодарнии иудее. * Мы же верою непреложною присно почитающе * яко благодетеля, * выну вопием Ему: * благословен еси грядый Адама воззвати.

И чтение праздника.

Песнь 4.

Ирмос: Христос грядый явственнo Бог наш, * придет и не закоснит, * от горы приосененныя чащи, * Отроковицы раждающия Неискусомужныя, * пророк древле глаголет. * Тем вси вопием: * слава силе Твоей Господи.

Да точат веселие крепкое мастительное, горы, и вси холми, и древа дубравная да зыграют: Христа хвалите языцы, и Тому вси людие радующеся возопийте: слава силе Твоей Господи.

Крепостию царствующий веки Господь, облечен придет, Сего красоты же и славы, несравненно есть благолепие в Сионе. Темже вси вопием: слава силе Твоей Господи.

Пядию измеривый небо, дланию же землю, Господь прииде, Сион бо избра, в немже жити и царствовати изволи, и возлюби люди верно вопиющия: слава силе Твоей Господи.

Катавасиа: Христос грядый явственнo Бог наш, * придет и не закоснит, * от горы приосененныя чащи, * Отроковицы раждающия Неискусомужныя, * пророк древле глаголет. * Тем вси вопием: * слава силе Твоей Господи.

Песнь 5.

Ирмос: На гору Сион възиди благовествуяй, * и Иерусалиму проповедуяй, * в крепости вознести глас: * преславная глаголашася о тебе граде Божий. * Мир на Израиля, и спасение языком.

Вышних седяй на херувимех Бог, и призираяй на смиренныя, Той грядет во славе со областию, и исполнятся всяческая Божественныя хвалы Его. Мир на Израиля, и спасение языком.

Сионе Божий, горо святая, и Иерусалиме, окрест очи твои возведи, и виждь собранная чада твоя в тебе: се бо приидоша издалеча, поклонитися Царю твоему. Мир на Израиля, и спасение языком.

Катавасия: На гору Сион взыди благовествуяй, * и Иерусалиму проповедуяй, * в крепости вознести глас: * преславная глаголашася о тебе граде Божий. * Мир на Израиля, и спасение языком.

Песнь 6.

Ирмос: Возопиша с веселием праведных души: * ныне миру Завет Новый заветается, * и кроплением да обновятся людие, * Божия крове.

Прими Израилю Божие царство, и пребываяй во тьме, свет да узрит великий, и кроплением да обновятся людие, Божественныя крове.

Разрешены своя юзники Сионе испусти, и от рова неведения безводна изведи, и кроплением да обновятся людие, Божественныя крове.

Катавасия: Возопиша с веселием праведных души: * ныне миру Завет Новый заветается, * и кроплением да обновятся людие, * Божия крове.

Кондак, самогласен, глас 6:

На престоле на небеси, * на жребяти на земли носимый Христе Боже, * ангелов хваление, и детей воспевание * приял еси зовущих Ти: * благословен еси грядый * Адама воззвати.

Икос: Понеже ада связал еси Безсмертне, и смерть умертвил еси, и мир воскресил еси, с ваиами младенцы восхваляху Тя Христе, яко победителя, зовуще Ти днесь: осанна Сыну Давидову. Не ктому бо, рече, заклани будут младенцы, за Младенца Мариина: но за вся младенцы и старцы, Един распинаешися. Не ктому на нас вместится меч: Твоя бо ребра прободутся копием. Темже радующеся глаголем: благословен грядый Адама воззвати.

Синаксарий. Стихи:

На жребя всед словом прострый небо:

Человеки взыскуяй, разрешити безсловесия.

В сий день, славный и пресветлый праздник ваий празднуем, вины ради сицевыя: по востании Лазарева из мертвых, мнози видевшие бывшее, вероваху во Христа и убо утверждается суд иудейскою сонмицею, Христа же, и самага убити Лазаря. Бегае убо Иисус место злобе дая, иудеи же в праздник Пасхи убити Его поучение положиша. И времени бегства дану бывшу долгу, прежде шести дней Пасхи, глаголет, прииде Иисус во Вифанию, идеже бе Лазарь умерый: и тамо обеду бывшу, ядаше с ним и Лазарь: сестра же его Мария на Христове нозе миро изливаше. И наутрие посылает ученики Своя привести ослицу и жребя. И имеяй престол небо, всед на жребя, входит во Иерусалим: дети же еврейския и сами подстилаху Ему ризы своя и ветви фиников, овья убо режуще, другия же и в руках носяще, вопияху Ему предсылающе: осанна Сыну Давидову, благословен грядый во имя Господне, Царь Израилев. Сие же бысть, оных языки подвигну Вsesвятому Духу, в славу и благохваление Христово. Являху же Христову на смерть победу ваиами, сиесть, ветвьми: ваиа бо у евреюв ветвь мягкая глаголется. Обычай бо

бѣше, яко победителе подвигов, или браний неких, ветвьми дрѣвес присноцветущих, в победных проведених почитаеми, и обводими бѣху. Гадательственнѣ же знаменоваше жребец, сущия ны от язык люди, на немже всѣ Христос, и препочив, одолетель и победитель, Царь же всея земли наречѣся. О сем празднице и пророк глаголаше Захария [гл. 9, ст. 9]: Радуйся зело дщи Сионова, се Царь твой грядет тебе кроток, и всѣ на подъяремника и жребца ося сына подъяремника. И Давид паки о детех: из уст младенец и ссущих совершил еси хвалу. Но входящу, рече, Христу потрясѣся весь Иерусалим: и во отпщение народи от архиереи поощрени бывше, смотряху Его убити: Той же таяшѣся крѣпяся, и являяся, притчами глаголаше им. Неизреченным Твоим милосердием Христе Боже наш, победители ны безсловесных страстей сотвори, и Твою светлую на смерть победу: ясное же и живоносное Воскресение видети сподоби, и помилуй нас ныне и присно, и во веки веков, аминь.

Песнь 7.

Ирмос: Спасый во огни Авраамския Твоя отроки, * и халдеи убив, яже правда праведно уловяше, * препетый Господи Боже отец наших, * благословен еси.

Покланяющѣся людие, и со ученики радующѣся, ваием, осанна Сыну Давидову зовяху: препетый Господи Боже отец, благословен еси.

Неискусозлобное множество, еще младенствующее естество, Боголепно Тя Царю Израильтеский и ангельский воспет: препетый Господи Боже отец, благословен еси.

С ваием Тя Христе, ветвьми похваляху множества, благословен пришедый Царь веков. Вопияху же препетый Господи Боже отец, благословен еси.

Катавасия: Спасый во огни Авраамския Твоя отроки, * и халдеи убив, яже правда праведно уловяше, * препетый Господи Боже отец наших, * благословен еси.

Песнь 8.

Ирмос: Веселися Иерусалиме, * торжествуйте любящии Сиона: * Царствуй бо во веки Господь сил прииде, * да благоговет вся земля от лица Его, и да вопиет: * благословите вся дела Господня Господа.

На жребя младо всѣ Царь твой Сионе, предста Христос: безсловесную бо идольскую прелесть разрушити, и неудержанное стремление уставити всех язык прииде, во еже пети: вся дела пойте Господа.

Бог твой, радуйся Сионе зело, воцарися во веки Христос. Сей, якоже писано есть, кроткий и спасаей, праведный Избавитель наш, прииде на жребяти, конское свирепство убити врагов, не вопиющих: благословите вся дела Господня Господа.

Оскудевает Божественных ограждений, законопреступное сонмище непокоривых, понеже дом молитвы Божия, вертеп сотвориша разбойническ, от сердца Избавителя отринувше, Емуже вопием: благословите вся дела Господня Господа.

Катавасия: Веселися Иерусалиме, * торжествуйте любящий Сиона: * Царствуяй бо во веки Господь сил прииде, * да благоговет вся земля от лица Его, и да вопиет: * благословите вся дела Господня Господа.

Честнейшую не поем.

Песнь 9.

Ирмос: Бог Господь, и явился нам, * составите праздник, и веселящися приидите, * возвеличим Христа, с ваиами и ветвymi, * песньми зовуще: * благословен грядый во имя Господа Спаса нашего.

Языцы вскую шатаются? писменницы, и священницы, почто тщетным поучистесь? кто Сей, рекше, Емуже дети с ваием и ветвymi, песньми зовут: благословен грядый во имя Господа Спаса нашего.

Сей Бог наш, Емуже никтоже подобен, праведный всяк путь изобрет, даде возлюбленному Израилю. По сих же с человеки поживе явлься: благословен грядый во имя Господа Спаса нашего.

Соблазны стези, что близ вас положите непокоривии? Ноги ваша скоры кровь излияти Владычно: но воскреснет всяко спасти зовущия: благословен грядый во имя Господа Спаса нашего.

Катавасия: Бог Господь, и явился нам, * составите праздник, и веселящися приидите, * возвеличим Христа, с ваиами и ветвymi, * песньми зовуще: * благословен грядый во имя Господа Спаса нашего.

Светильна же не глаголем, но абие:

Свят Господь Бог наш. Трижды, на глас 4.

На хвалитех поставим стихов 6,

и поем стихиры самогласны 4, повторяюще два.

Глас 4:

Множество народа Господи, * постилаху по пути ризы своя: * друзии же резаху ветви от древес, и ношаху. * Предыдущии же и последующии, * зовяху глаголюще: * осанна Сыну Давидову, * благословен еси пришедый, * и паки грядый во имя Господне. [Дважды.]

Хотящу Тебе внити во святыи град Господи, * ветви садов людие ношаху, * Тебе поюще всех Владыку: * и зряще Тя на жребяти сидяща, * якоже на херувимех зряху. * Сего ради сице вопияху: * осанна в вышних, благословен еси пришедый, * и паки грядый во имя Господне. [Дважды.]

Изыдите языцы, изыдите и людие, * и видите днесь Царя Небеснаго, * яко на престоле висоце, * на жребяти худе во Иерусалим входяща. * Роде иудейский неверный и прелюбодейный, * прииди и виждь, Егоже виде Исаия во плоти нас ради * приити имуща, * како уневещает Себе, яко целомудренный новый Сион, * и отлагает осужденную сонмицу: * яко в нетленном же брале и нескверном, *

несквернии стекопаша благохваляще, * неискусозлобнии дети. * С нимиже и мы поюще возопием песнь ангельскую: * осанна в вышних, Имущему велию милость.

Общее воскресение, * прежде вольныя страсти Твоя, * во уверение всех предпоказавый Христе Боже, * Лазаря убо в Вифании, * державною силою Твоею, * четверодневна мертва воскресил еси: * слепцем же еже видети яко Светодавец даровал еси Спасе, * и во святыи град со ученики Твоими вшел еси, * седя на жребяти осли, * пророческая исполняя проповедания, * якоже на херувимех носимый, * и дети еврейстии с ветвми и ваиами предсретаху Тя. * Темже и мы ветви масличныя носяще и ваиа, * благодарственно Тебе вопием: * осанна в вышних, * благословен грядый во имя Господне.

Слава, и ныне, глас 6:

Прежде шести дней Пасхи, * прииде Иисус в Вифанию, * и приступиша к Нему ученицы Его, глаголюще Ему: * Господи, где хочещи уготоваем Ти ясти Пасху? * Он же посла их, * идите в преднюю весь, * и обрящете человека скудель воды носяща, * последуйте ему, и дому владыце рците: * Учитель глаголет, у тебе сотворю Пасху * со ученики Моими.

Славословие великое. И тропарь: Общее воскресение:

Общее воскресение, * прежде Твоя страсти уверяя, * из мертвых воздвигл еси Лазаря Христе Боже. * Темже и мы яко отроцы победы знамения носяще, * Тебе победителю смерти вопием: * осанна в вышних, благословен Грядый во имя Господне.

Таже ектении, и час первый, и оглашение, и обычный отпуст, и лития вне монастыря.

НА ЛИТУРГИИ

Антифон 1, глас 2, псалом 114.

Стих 1: **В**озлюбих, яко услышит Господь * глас моления моего.

Припев: Молитвами Богородицы, Спасе спаси нас.

Стих 2: **Я**ко приклони ухо Свое мне, * и во дни моя призову.

Припев: Молитвами Богородицы, Спасе спаси нас.

Стих 3: **О**бъяша мя болезни смертныя, * беды адовы обретоша мя.

Припев: Молитвами Богородицы, Спасе спаси нас.

Стих 4: **С**корбь и болезнь обретох, и имя Господне призвах.

Слава, и ныне: Молитвами Богородицы, Спасе спаси нас.

Молитвами Богородицы, Спасе спаси нас.

Антифон 2, псалом 115.

Стих 1: **В**еровах, темже възглаголах: аз же смирихся зело.

Припев: Спаси ны Сыне Божий, * возседый на жребя, поющия Ти: аллилуиа.

Стих 2: **Ч**то воздам Господеви о всех, яже воздаде ми?

Припев: Спаси ны Сыне Божий, * возседый на жребя, поющия Ти: аллилуиа.

Стих 3: **Ч**ашу спасения прииму, и имя Господне призову. Спаси ны Сыне Божий:

Припев: Спаси ны Сыне Божий, * возседый на жребя, поющия Ти: аллилуиа.

Стих 4: **М**олитвы моя Господеви воздам, пред всеми людьми Его. Спаси ны Сыне Божий:

Слава, и ныне: Единородный Сыне:

Антифон 3, глас 1, псалом 117:

Стих 1: **И**споведайтесь Господеви яко благ, яко в век милость Его:

Тропар, глас 1:

Общее воскресение, * прежде Твоя страсти уверяя, * из мертвых воздвигл еси Лазаря Христе Боже. * Темже и мы яко отроцы победы знамения носяще, * Тебе победителю смерти вопием: * осанна в вышних, благословен Грядый во имя Господне.

Стих 2: **Д**а речет убо дом Израилев: яко благ, яко в век милость Его.

Тропарь: **О**бщее воскресение:

Стих 3: **Д**а речет убо дом Ааронь: яко благ, яко в век милость Его.

Тропарь: **О**бщее воскресение:

Стих 4: **Д**а рекут убо вси боящиеся Господа: яко благ, яко в век милость Его.

Тропарь: Общее воскресение:

Вход: Благословен грядый во имя Господне, благословихом вы из дому Господня, Бог Господь, и явился нам.

Тропар, глас 1:

Общее воскресение, * прежде Твоя страсти уверяя, * из мертвых воздвигл еси Лазаря Христе Боже. * Темже и мы яко отроцы победы знамения носяще, * Тебе победителю смерти вопием: * осанна в вышних, благословен Грядый во имя Господне.

Слава: глас 4:

Спогребшися Тебе крещением Христе Боже наш, * безсмертныя жизни сподобихомся воскресением Твоим, * и воспевающе зовем: осанна в вышних, * благословен Грядый * во имя Господне.

И ныне, Кондак, глас 6:

На престоле на небеси, * на жребяти на земли носимый Христе Боже, * ангелов хваление, и детей воспевание * приял еси зовущих Ти: * благословен еси грядый * Адама воззвати.

Таже Трисвятое.

Прокимен Апостола, глас 4:

Прокимен: Благословен грядый во имя Господне, * Бог Господь, и явился нам.

Стих: Исповедайтесь Господеву яко благ, яко в век милость Его.

Апостол к Филипписием, зачало 247. [Флп. IV, 4 – 9]

Братие, радуйтесь всегда о Господе, и паки реку, радуйтесь. Кротость ваша разумна да будет всем человеком. Господь близ. Ни о чемже печытесь, но во всем молитвою и молением со благодарением прошения ваша да сказуются к Богу. И мир Божий, превосходяй всяк ум, да соблюдет сердца ваша и разумения ваша о Христе Иисусе. Прочее же, братие моя, елика суть истинна, елика честна, елика праведна, елика пречиста, елика прелюбезна, елика доброхвальна, аще кая добродетель, и аще кая похвала, сия помышляйте. Имже и научитесь, и приясте, и слышасте, и видесте во мне, сия творите, и Бог мира будет с вами.

Аллилуиа, глас 1: Воспойте Господеву песнь нову, яко дивна сотвори Господь.

Стих: Видеша вси концы земли спасение Бога нашего.

Евангелие от Иоанна, зачало 41. [Ин., XII, 1 – 18]

Прежде шести дний Пасхи прииде Иисус в Вифанию, идеже бе Лазарь умерый, егоже воскреси от мертвых. Сотвориша же Ему вечерю ту, и Марфа служаще, Лазарь же един бе от возлежащих с Нем. Мариа же приемши литру мира нарда пистика многоценна, помаза нозе Иисусове, и отре власы своими нозе Его. Храмина же исполнися от вони масти благовонныя. Глагола же един от ученик Его, Иуда Симонов Искаротский, иже хотяше Его предати: чесо ради

миро сие не продано бысть на триех стех пенязь и дано нищым? Сие же рече, не яко о нищих печашеся, но яко тать бе, и ковчежец имеша, и вметаема ношаша. Рече же Иисус: не дейте ея, да в день погребения Моего соблюдет е. Нищья бо всегда имате с собою, Мене же не всегда имате. Разуме же народ мног от Иудей, яко ту есть, и приидоша не Иисуса ради токмо, но да и Лазаря видят, егоже воскреси от мертвых. Совецаша же архиереи, да и Лазаря убьют, яко мнози его ради идяху от Иудей и вероваху во Иисуса. Во утрий же день народ мног пришедый в праздник, слышавше, яко Иисус грядет во Иерусалим, прияша ваиа от финик и изыдоша в сретение Ему, и зваху глаголюще: осанна, благословен грядый во имя Господне, Царь Израилев. Обрет же Иисус осли, вседе на не, якоже есть писано: не бойся, дщи Сионя, се Царь твой грядет, сидя на жребяти осли. Сих же не разумеша ученицы Его прежде, но егда прославися Иисус, тогда помянуша, яко сия быша о Нем писана, и сия сотвориша Ему. Свидетельствоваша убо народ, иже бе прежде с Ним, егда Лазаря возгласи от гроба и воскреси его от мертвых. Сего ради и сrete Его народ, яко слышаша Его сие сотворша знамение.

И бывает Литургия Златоустова.

Причастен: Благословен грядый во имя Господне, Бог Господь, и явися нам. Аллилуиа, трижды.

На трапезе утешение: ядим рыбы, и вино пием, благодаряще Бога.